

FÉISS: NET NËMME FIR ZE LAFEN



D'Féiss vun de Vulle verrode ganz vill iwwer hir Liewensweis.

Inten hunn eng Schwammhaut tèschent den Zéiwen a kënnen dofir ganz gutt schwammen. Och déi méi déck Fatzen un de Féiss vum Däichelchen, *Tachybaptus ruficollis*, sinn fir d'Schwamme gëeegent.

Gräifvullen an Eile fänke mat hire scharfe Krallen aner Déieren, déi meeschtens dann duerch e Bëss an de Kapp dout gemaach ginn.

Duerch hir laang Zéiwe komme Reeër, wéi de Mouerochs, *Botaurus stellaris*, a Limikolen, wéi de Bëschwaasserleefer, *Tringa ochropus*, ganz gutt duerch de Bulli ouni ënnerzegoen.

D'Féiss vun de Sangvullen hu 4 Zéiwen, vun deenen 3 no vir an eng no hanne geriicht sinn. Domat kënnen si sech gutt un engem Aascht oder engem Planzenhallem festhalen.

Bei de Spiechte sinn 2 Zéiwen no vir an 2 no hanne geriicht, wat hinnen d'Kloteren u Bamstämm erméiglecht.